

Sarajevo, 30.11.2015. godine
Broj: I-103/15

FEDERALNO MINISTARSTVO ENERGETIKE, RUDARSTVA I INDUSTRIJE
N/P gosp. Nermin Džindić, Ministar

FEDERALNO MINISTARSTVO FINANSIJA
N/P g-đa. Jelka Milićević, Ministrica

Predmet: **Taksa za uspostavu rezervi naftnih derivata**

Poštovani,

Dana 09.10.2015. godine zaprimili smo dopis Ministarstva energetike, rudarstva i industrije, broj: 05-02-1936/15 kojim obavještavate da će nadležni organi u narednom periodu provoditi pojačan nadzor nad primjenom Zakona o naftnim derivatima, u dijelu koji se odnosi na taksu za uspostavu naftnih rezervi, te upozoravate da u slučaju neplaćanja takse Zakon propisuje kaznene odredbe.

Članovi Udruženja poslodavaca FBIH žele da poštuju svoje zakonske obaveze, pa tako i da plaćaju taksu za uspostavu naftnih derivata koja je propisana članom 30. stav 1. Zakona o naftnim derivatima (Sl.novine FBIH broj: 52/14). Prema našim saznanjima, više od 90% članica UPFBiH, a koji su obveznici plaćanja, plaćaju navedenu taksu.

Međutim određeni broj naših članica obratio nam se jer imaju poteškoće prilikom izvršavanja uplate navedene takse. U skladu sa članom 30. stav 10. Zakona o naftnim derivatima u FBIH Federalni ministar finansija će propisati obrazac i način uplate takse. Budući da se iznos navedene takse posebno obračunava i dodaje maloprodajnoj cijeni i prikazuje zasebno na fiskalnom računu, nije nam jasno na osnovu kojeg se propisa tako radi, jer druge takse i naknade se ne prikazuju na navedeni način, ovo tim više što je član 30. Stav 5. gore pomenutog zakona neprecizan i teško se može primjeniti bez provedbenog akta. Izmjenama i dopunama Pravilnika o načinu uplate javnih prihoda budžeta i vanbudžetskih fondova nije otklonjena navedena dilema. Shodno navedenom molim vas da nam dostavite:

- ***Informaciju kojim se podzakonskim aktom i na koji način reguliše način iskazivanja i plaćanja takse za uspostavu rezervi naftnih derivata.***

Također, obratio nam se veći broj naših članica sa informacijom da ih inspekcijski organi upozoravaju da je iskazivanje navedene takse na računu suprotno Zakonu o unutrašnjoj trgovini.

Za sada nismo naišli na primjer izricanja kazne zbog toga ali ni to nije isključeno. Zakon o unutrašnjoj trgovini FBIH, član 63. propisuje novčane kazne za trgovca-pravno lice 3.000-15.000 KM, odgovorno lice u pravnom licu 400-2.000 KM, te trgovca - fizičko lice 500-1.500 KM, zbog formiranja i isticanja cijene koja nije u apoenima važećim u BiH, od 3.000-15.000 KM. Takođe ističemo da utvrđivanje navedene takse nije u skladu ni sa Smjericama Centralne banke BiH, o zaokruživanju iznosa za plaćanje u platnom prometu. Shodno iznijetom molimo vas da nam dostavite ili nas uputite na:

- ***Pravni akt kojim naše članice mogu dokazati ispravnost svog postupanja i izbjeći eventualne kazne zbog kršenja zakona.***

Da stvar bude još gora, Uprava za indirektno oporezivanje je pokrenula postupak naplate PDV-a na taksu za uspostavu naftnih derivata. Članstvo UP FBIH se nalazi pred tužbama zbog toga što nije plaćalo PDV na navedenu taksu, a uredno ispunjavaju svoje zakonske obaveze. Član 30. stav 4. Zakona o naftnim derivatima propisuje da se taksa obračunava na već utvrđenu maloprodajnu cijenu, te da nije uključena u osnovicu za obračun PDV-a. S druge strane, član 20. Zakona o PDV-u propisuje da se u poresku osnovicu koja se odnosi na promet dobara i roba uračunavaju i **javni prihodi**. U skladu sa tim molimo vas da nam dostavite:

- ***Tumačenje navedenih odredbi kako bi se riješio ovaj pravni problem.***

Uvaženi Ministre/Ministrice, iskreno se nadam da ćemo se složiti kako se plemenita namjera potpuno dezavuiše lošim propisom. Shodno navedenom molim vas za hitnu reakciju u smislu prevazilaženja navedenog problema. Ukoliko se skoro ne dođe do rješenja u opštredruštvenom interesu, bićemo prinuđeni da pozovemo članice da ne plaćaju, ovaj po nama nezakonit i protivustavan namet i provesti pravni postupak kojim bi to i dokazali.

Molim vas da primite izraze mog osobitog uvažavanja.

DIREKTOR

Mladen Pandurević